



Tadbirkorga pand bermang!

4-betda o'qing



"Xabeas korpus" instituti va "Miranda qoidasi" bu haqda nimalarni bilamiz?

7-betda o'qing

INSON va qonun

www.adolatmarkazi.uz [telegram.me/hudud24official/](https://t.me/hudud24official/) facebook.com/hudud24official/

2023-YIL
27-IYUN
SESHANBA

№ 25 (1385)

www.hudud24.uz

@adolat_nashrlari



"ADOLAT" milliy huquqiy axborot markazi nashrlariga obuna bo'ling!



"Adolat nashrlari" telegram kanalida kuzating!



27-IYUN –

Matbuot va ommaviy axborot vositalari xodimlari kuni



SO'Z QADRI – O'Z QADRIMIZ!

Jurnalning qismati qog'oz va qalam. Ba'zan uning ustiga qora ranglar bostirib kirs, gohida yorqin va hayotbaxsh ranglarning ta'mini tuyib, baxt va halovat topasan. Biz ham ana shu qog'oz va qalamga umrimizni bag'ishladik. Shu qimmatli hayot va shu sinovli yillar bizni tarbiyaladi. Umrimizga umr qo'shildi sayin hayotning ma'nosini, mazmunini teranroq his eta boshladik. Yildan-yilga davr va zamon, odamlar, tafakkurimiz o'zgardi, ulg'aydik, yuksaldik, gohida qoqildik, yiqildik, yaxshilikka xayrixoh bo'ldik, yomonlikdan aziyat chekdik, hazar qildik.

Xatolarimizdan saboq oldik. Xulosalarimiz aniq bo'ldi. Nazarimizda biz ekan daraxtlar xazon bo'layotgandek. Biz suv ichgan daryolar quriyotgandek... Tabiatni toptaganimiz sari nafasimizga tuzoq qo'yayotganimiz, toza havoga zavol bo'layotganimiz ayon bo'ldi. Odamzod chang-to'zon ichidan o'zini axtarishga tusha boshladi. Lekin endi kech... Eng achinarlisi, taraqqiyot pardasi ortiga, ko'rkam binolarimiz

soyasiga bu illatni yashirmoqchi bo'layapmiz. Bu aybimizni iqlim o'zgarishi degan bahona bilan oqlashga o'rganib qoldik. Oqibatini o'ylashga, aniqlashga, tan olishga esa... jur'atimiz yo'q, kibru havomiz, manmanligimiz yo'l bermaydi.

Yana bir illat qarshisida olijmiz, kuchsizmiz va shuning uchun ham qalamimiz bilan shu tomonga og'ishni boshladik. Yildan-yilga mehr qahat bo'layotganini tan olgimiz kelmaydi... Ma'naviyat haqidagi cho'pchaklar eskirdi. Ma'naviyat jarohatlari bitmaydigan darajaga yetdi. Odamlarning bir-biriga qilayotgan tajovuzlari, yovuzliklari, nafratlari hatto yovvoyi, eng yirtqich hayvonlarda ham yo'q. Shu darajaga yetdikki, cho'kayotgan odamga yordam berish o'rniga uni video tasvirga olib tarqatadigan toshbag'irga aylandik. Yarim dunyoni mehr bilan egallagan Sohibqiron Amir Temur tartiblaridan, o'lmas tuzuklaridan juda uzoqdamiz.

8-betda o'qing



Adliya vazirligida Oliy Majlis Senati tashabbusi bilan har yili o'tkazib kelinayotgan "Gender tenglik faoli" milliy tanlovining navbatdagi taqdirlash marosimi bo'lib o'tdi.

"ADOLAT" MILLIY HUQUQIY AXBOROT MARKAZI – "GENDER TENGLIK FAOLI" MILLIY TANLOVI G'OLIBI

Tadbir davomida Adliya vazirligi huzuridagi "Adolat" milliy huquqiy axborot markazi "Gender tenglikni targ'ib qilishga qaratilgan eng yaxshi nashr", "O'zarxiv" agentligi "Gender tenglikni ta'minlashda eng faol respublika darajasidagi davlat organi" nominatsiyasi g'olibi deb topildi hamda g'oliblar maxsus diplom va esdalik sovg'alari bilan taqdirlandi.

Taqdirlash marosimida adliya vaziri o'rinbosari A. Karimov, Senatning Xotin-qizlar va gender tenglik masalalari qo'mitasi raisi M. Kadirxanova, Senatning Xotin-qizlar va gender tenglik masalalari qo'mitasi a'zosi, senator Gulnora Marufova, Oila va xotin-qizlar qo'mitasi vakillari ishtirok etishdi.

O'z muxbirimiz



BIRINCHI O'ZBEK AKADEMIK AYOLINI ESLAB...

X. Sulaymonova nomidagi Respublika sud ekspertizasi markazida "O'zbek ayollaridan birinchi akademik ayol Xadicha Sulaymonovaning hayoti, faoliyati va ilmiy merosi" mavzusidagi konferensiya va ommaviy axborot vositalari xodimlari uchun press-tur tashkil etildi.

Tadbirda O'zbekiston Respublikasi Fanlar akademiyasi Davlat va huquq instituti, O'zbekiston yuristlar assotsiatsiyasi va ommaviy axborot vositalari vakillari hamda blogerlar ishtirok etdi.


Tadbir doirasida OAV vakillariga X. Sulaymonova nomidagi Respublika sud ekspertizasi markazi faoliyati, amalga oshirilayotgan islohotlar samarasi, yangi joriy etilgan ekspertiza turlari, takomillashtirilgan zamonaviy moddiy-texnik baza haqida batafsil ma'lumot berildi.

Jamiatimizda demokratik qadriyatlarini qaror toptirish, fuqarolarning axborot sohasidagi konstitutsiyaviy huquqlarini ta'minlash, sud-huquq sohasidagi islohot-

lar, dunyoda va mamlakatimizda sodir bo'layotgan ijtimoiy-siyosiy jarayonlar, voqea-hodisalar haqida tezkor va haqqoniy ma'lumotlar yetkazish borasida ommaviy axborot vositalari vakillarining mehnatlari alohida e'tirof etildi. 27-iyun – Matbuot va ommaviy axborot vositalari xodimlari kuni munosabati bilan markaz faoliyatini keng yoritayotgan ommaviy axborot vositalari xodimlari taqdirlandi.

O'z muxbirimiz

2 KONSTITUTSIYANI O'RGANAMIZ

SHA'NIMIZ VA QADRIMIZ
HIMOYACHISI

Ma'lumki, mamlakatimizda barcha davlat hokimiyati va boshqaruv organlarining asosini "xalq" tashkil etadi. Konstitutsiyamizning 7-moddasida "Xalq davlat hokimiyatining birdan-bir manbaidir" deb belgilab qo'yilgan.

Konstitutsiyaning 2-moddasida davlat va uning organlaridagi har bir muhim islohot xalqimiz, irodasini, manfaati va dunyoqarashini, kundalik turmush sharoitini, xohish va istaklarini o'zida qamrab olishi shart ekanligi keltirib o'tilgan. Mazkur norma "Davlat suvereniteti" bobiga kiritilmagan. Ya'ni, bundan tushunish mumkinki,

xalq irodasi konstitutsiyaviy darajada eng yuqori o'ringa qo'yilgan.

2023-yil 30-aprelda Konstitutsiya-ga qo'shimcha va o'zgartirishlar kiritish bo'yicha bo'lib o'tgan referendumda Asosiy qomusimiz deyarli 65 foiz o'zgartirildi, unga 27 ta yangi modda kiritildi, qo'shimcha bandlar bilan to'ldirildi. Konstitutsiyamizga qo'shimcha va o'zgartirishlar kiritishda xalqaro darajada ratifikatsiya qilingan hujjatlar, konvensiyalar va deklaratsiyalar-ga to'laqonli ravishda yondashildi.

"Inson huquqlari umumjahon deklaratsiyasini"ning 2-moddasida: "Har

bir inson irqi, tana rangi, jinsi, tili, dini, siyosiy yoki boshqa e'tiqodlaridan, milliy yoki ijtimoiy kelib chiqishi, mol-mulki, tabaqasi yoki boshqa holatidan qat'i nazar ushbu Deklaratsiyada e'lon qilingan barcha huquq va barcha erkinliklarga ega bo'lishi zarur" deb ta'kidlangan.

Konstitutsiyamizning har bir moddasi jahon hamjamiyati tomonidan umumqabul qilingan, tan olingan va ratifikatsiya qilingan har qanday qoida va mezonlarga to'laqonli moc keladi. Konstitutsiyaning 77-moddasidagi "Davlat va jamiyat yetim

bolalarni hamda ota-onasining vasiyiligidan mahrum bo'lgan bolalarni boqishni, tarbiyalashni, ularning ta'lim olishini, sog'lom, to'laqonli va har tomonlama kamol topishini ta'minlaydi, shu maqsadda xayriya faoliyatini rag'batlantiradi" degan qoida "Bola huquqlari to'g'risidagi konvensiya"ning 9-moddasiga mos keladi. Ya'ni, "Ishtirokchi-davlatlar ota-onasining bittasi yoki har ikkovidan ham ayrilgan bolaning ular bilan muntazam ravishda shaxsiy munosabatlar va to'g'ridan-to'g'ri aloqalar bog'lab turish huquqini hurmat qiladilar, bunday munosabatlar bolaning eng yaxshi manfaatlariga zid keladigan bo'lsa bundan mustasno bo'ladi" degan qoida bilan bevosita bog'liqdir.

Konstitutsiya fuqarolarimizning barcha ajralmas huquqlarini o'zida mujassam ettiradi. Yangi O'zbekistonda erkin va mustaqil fikrlaydigan, uning ijtimoiy-siyosiy hayotida faol ishtirok etadigan, o'z so'zini aytishga qodir yoshlarimiz uchun ham bu Qomus kundalik hayotlarida asosiy dasturilamal bo'lib xizmat qiladi.

Najmiddin ESHMURZAYEV,

Sariosiyo tuman adliya bo'limi Yuridik xizmat ko'rsatish markazi bosh yuriskonsulti

O'qituvchining maqomi
KONSTITUTSIYADA HAM
MUSTAHKAMLANGAN

Jamiyatimizda o'ta mas'uliyatli kasblar juda ko'p. Ular orasida ko'proq mehnat va fidoyilik talab etadigan o'qituvchilikdir. Zero, har bir kasb egasi muallim orqali o'z yo'lini topadi. Har bir inson o'ziga kerakli, hayoti uchun zarur ilmni, dinu diyonatni, halol-haromni bilishi, buning uchun zarur bo'lgan narsalarni o'rganishi farzi ayndir. Ilmsiz kishi odobli va ko'rkam bo'la olmaydi. Inson yo'qki, ustoz-muallim sabog'isiz kamolga erishgan bo'lsa! Shuning uchun bo'lsa kerak, xalqimiz azal-azaldan o'qituvchi-pedagoglarni qadrlab keladi.

Keyingi yillarda o'qituvchi va murabbiylarning jamiyatimiz hayotidagi o'rni va ta'sirini kuchaytirish, ta'lim tizimini zamon talablari asosida tashkil etish bo'yicha bir qator islohotlar amalga oshirilmoqda. Mamlakatimizda o'qituvchining mehnati jamiyat va davlatni rivojlantirish, sog'lom, barkamol avlodni shakllantirish hamda tarbiyalash, xalqning ma'naviy va madaniy salohiyatini saqlash hamda boyitishning asosi sifatida e'tirof etiladi.

Davlat o'qituvchilarning sha'ni va qadrigimmatini himoya qilish, ularning ijtimoiy va moddiy farovonligi, kasbiy jihatdan o'sishi to'g'risida g'amxo'rlik qiladi. Yangi Konstitutsiyaning 52-moddasida "O'zbekiston Respublikasida o'qituvchining mehnati jamiyat va davlatni rivojlantirish, sog'lom, barkamol avlodni shakllantirish hamda tarbiyalash, xalqning ma'naviy va madaniy salohiyatini saqlash hamda boyitishning asosi sifatida e'tirof etiladi.

Davlat o'qituvchilarning sha'ni va qadrigimmatini himoya qilish, ularning ijtimoiy va moddiy farovonligi, kasbiy jihatdan o'sishi to'g'risida g'amxo'rlik qiladi" deb belgilandi.

Konstitutsiyadagi mazkur norma-ga o'xshash qoidalar 1966 yil 5 iyuldagi UNESCOning "O'qituvchilar maqomi to'g'risida"gi tavsiyasining 7-bandida ham qayd etilgan. Unga ko'ra, pedagogning "erkinligi prinsipi" mustahkamlangan. Shuningdek, Germaniya, Portugaliya va Misr davlatlarining konstitutsiyalarida ham mazkur norma mavjud.

Bunday huquqiy kafolat ta'lim sifatini oshirishga xizmat qiladi. Chunki, o'qituvchilarning jamiyatdagi mavqei va hurmati yuqori bo'lsa, ularning o'z ishiga rag'batli, fidoyiligi va sadoqati yuqori bo'ladi. Bu o'quvchilarga berilayotgan ta'lim sifatining oshishiga ham olib keladi. Jamiyatda o'qituvchilik kasbini tanlovchilar soni ortadi. Odamlarning ushbu kasbga qiziqishi kuchayib, ta'lim sohasida ishlashga tayyor yuqori malakali va iqtidorli pedagoglar ko'payadi. Zero, dunyo mamlakatlari orasida xalqining o'rtacha intellektual darajasi yuqori ko'rsatkichlarga yetgan Yaponiya, Germaniya, Isroil, Singapur, Janubiy Koreya kabi ko'plab davlatlar borki, bunga ular faqat va faqat ta'lim tizimini mustahkamlash hamda o'qituvchilar mavqegini oshirish orqali erishgan.

Mahbuba RASULOVA,

Toshkent davlat yuridik universiteti o'qituvchisi



Xalqimizda "Ustoz – otangdek ulug'", degan ibora bor. Ustoz namunasi sanalgan o'qituvchilik azal-azaldan e'tiborli kasb hisoblanib kelgan.

Butun dunyoda 2017-yil noyabr oyidan boshlab kriptovalyuta turi – bitcoin va boshqa raqamli kriptovalyutalar rivojlana boshladi va tezda butun dunyoda raqamli pul birligi vositasi sifatida tarqaldi. Faqat bu davrda ham Bangladesh, Boliviya, Ekvador, Qirg'iziston va Vetnamda taqiqlandi, Xitoy va Rossiya esa ularni taqiqlashni taklif qilib chiqdi.

Hozirgi kunda mamlakatimizda raqamli iqtisodiyotni rivojlantirish davlat iqtisodiy siyosatining ustuvor yo'nalishlaridan biri hisoblanadi. Bugungi kunda zamonaviy texnologiyalar hayotimizning barcha jabhalariga jadal kirib bormoqda. Xususan, moliyaviy xizmatlar sohasida bu jarayon, ayniqsa, yaqqol namoyon bo'lmoqda.

Raqamlashtirish natijasida onlayn to'lovlar, elektron pullar, mobil to'lov tizimlari bilan bir qatorda kripto-aktivlar sohasi qamrovi ham kengaymoqda.



Hozirgi globallashuv davrida insoniyat har qanday sun'iy intellektlarga moslashib borishi shart. O'tgan ko'p yillar davomida raqamli valyutani yaratish uchun ancha urinishlar bo'ldi.

KRIPTOVALYUTALAR HUQUQIY HOLATI VA TURLARI

Kripto-aktivlar zamonaviy texnologiyalarga asoslangan to'lov va hisob-kitob tizimlaridir. Bunday holda, mablag'lar banklar yoki boshqa turdagi vositachilarni jalb qilmasdan to'g'ridan-to'g'ri bir foydalanuvchidan ikkinchisiga o'tkazilishi mumkin. Kripto-aktivlar bilan operatsiyalarni amalga oshirish va saqlash, kripto-aktivlarni yaratish bilan bog'liq jarayonlar to'liq avtomatlashtirilgan va blokcheyn tizimida ma'lumotlarni markazlashtirilgan saqlash ularning ishonchlilik darajasini ta'minlaydi. 2017-yilda Singapurda tashkil etilgan TripleA xalqaro kompaniyasi jahon statistikasiga asoslanib, quyidagi raqamlarni keltiradi: kriptovalyutalar egalari soni bo'yicha O'zbekiston dunyo davlatlari orasida 52-o'rinni (344 047) egallab, 2022-yil holatiga ko'ra, mamlakat aholisining 1,03 foizini tashkil etgan.

"Chainalysis" kompaniyasining "Global Cryptocurrency Adoption Index 2021" hisobotiga ko'ra, kriptovalyutalarning global qabul qili-

nishi rivojlanayotgan bozorlarda kriptovalyutalardan foydalanishni rag'batlantiradigan peer-to-peer platformalari tufayli 880 foizdan ko'proqqa oshgan. Markaziy va Janubiy Osiyo, Okeaniya, Lotin Amerikasi va Afrika, G'arbiy Yevropa yoki Sharqiy Osiyo kabi iqtisodiyoti o'rta kattaroq mintaqalarga qaraganda p2p-platformalariga ko'proq veb-trafik yuboradi.

■ KRIPTOAKTIVLAR MUOMALASI TAQIQLANGANMI?

Respublikada kripto-aktivlar muomalasi huquqiy tartibga solishning hozirgi holati qanday?

Dastlabki qadam bilan 2018-yil 3-iyulda Prezidentning "O'zbekiston Respublikasida raqamli iqtisodiyotni va kripto-aktivlar aylanmasi sohasini rivojlantirish chora-tadbirlari to'g'risida"gi qarori e'lon qilindi. Unga muvofiq, respublikada kriptoaktivlar muomalasi taqiqlanmagani, biroq kripto-aktivlar muomalasi bilan bog'liq faoliyat litsenziyalanishi kerakligi belgilandi.

Lekin, amaliy jihatdan kripto-aktivlar savdosini faqatgina kripto-birjalarda amalga oshirishga ruxsat berilgan. Hozirda O'zbekiston Respublikasida bitta kripto-birja "Uznex" faoliyat ko'rsatmoqda. Ma'lumot o'rnida shuni aytish kerakki, "Uznex" kripto-birjasi ILMA tomonidan berilgan amal qilish muddati cheklanmagan litsenziya asosida ishlaydi. Ta'sischisi "Kobea group" AJ (Koreya Respublikasida 2018-yil 16-oktabrda ro'yxatga olingan) Garantex kriptovalyuta birjasi ham O'zbekistonda o'z vakolatxonasini ochish imkoniyatini ko'rib chiqmoqda.

Yuqorida keltirilgan Prezident qarori kripto-aktivlar muomalasini tartibga solishda mamlakatimiz tomonidan birinchi qadam bo'lib, bu yo'nalishdagi siyosatning dastlabki yondashuvlarini o'zida mujassam etadi.

Mazkur qarorga Prezidentning 2022-yil 27-apreldagi "O'zbekiston Respublikasi Prezidentining ayrim hujjatlariga o'zgartirish va qo'shimchalar kiritish, shuningdek, ba'zilarini o'z kuchini yo'qotgan deb hisoblash to'g'risida"gi farmoniga muvofiq bir qator o'zgartirishlar kiritildi. Unga ko'ra, kripto-aktivlar aylanmasi sohasini yanada takomillashtirish bo'yicha eng muhim vazifa – investitsiyaviy va tadbirkorlik faoliyatining turli shakllarini diversifikatsiya qilish uchun kripto-aktivlar aylanmasi sohasidagi faoliyatni, jumladan mayning, smart-kontrakt, konsalting, emissiya, ayirboshlash, saqlash, taqsimlash, boshqarish, sug'urtalash, shuningdek, ma'lumotlarning taqsimlangan reyestri texnologiyalarini joriy etish va rivojlantirishdir.

Kripto-aktivlar aylanmasi maxsus normativ-huquqiy hujjatlar bilan tartibga solinadi. Qonunosti hujjatga ko'ra, kripto-aktiv mulkiy huquq hisoblanib, ma'lumotlarning taqsimlangan reyestridagi raqamli yozuvlar yig'indisi bo'lgan qiymati va egasiga egadir. Kripto-aktivlar aylanmasi sohasidagi faoliyat turlariga mayning va kripto-aktivlar aylanmasi sohasidagi xizmatlar provayderlar faoliyati kiradi.

Shuni ta'kidlash joizki, qonun chiqaruvchi tomonidan qonun darajasida raqamli aktivlar – kripto-aktivlar, ular o'z aksini topadigan reyestr – blokcheynga huquqiy maqom yoki asos belgilanmagan. Raqamli pullar va aktivlarning farqi qonuniy jihatdan mustahkamlanmagan.

■ JAVOBGARLIKNI NAZARDA TUTMAYDIMI?

Kripto-aktivlarning noqonuniy muomalasi va yashirin mayningning ortib borayotganiga qaramay, Jinoyat va Ma'muriy javobgarlik to'g'risidagi kodekslar hali ham javobgarlikni nazarda tutmaydi. Mutaxassislarning fikricha, bu muammo kriptoaktivlar aylanmasi ustidan nazoratning past darajasi, ularning markazlashmagan muomalasining texnologik xususiyatlari va O'zbekistonda faqat xorijiy

yuridik shaxslar uchun kriptovalyuta birjasini yaratish huquqi bilan bog'liq bo'lib, bu mayningni qonuniylashtirishiga to'sqinlik qilmoqda. Shuningdek, mayning-fermalar tomonidan katta miqdorda energiya iste'mol qilinishi mamlakat infratuzilmasiga zarar yetkazayotganini ko'rishimiz mumkin.



■ ISTIQBOLLI LOYIHALAR MILLIY AGENTLIGI

Istiqbolli loyihalar milliy agentligi kripto-aktivlar muomalasi sohasidagi vakolatli davlat organi hisoblanadi.

Kripto-birja, mayning-pul, kripto-depozitariy, kripto-do'konlar ayni vaqtda mamlakatimiz aholisi o'rtasida muomalaga kirib borishi inobatga olinsa, uni biz xizmatlar provayderlari turlari sifatida baholashimiz mumkin bo'ladi.

2023-yil 1-yanvardan O'zbekiston fuqarolari va yuridik shaxslari kripto-aktivlarni faqat milliy provayderlar orqali sotib olishlari, sotishlari va (yoki) almashishlari mumkin.

Litsenziya olish talablari va shartlari doirasida xizmat ko'rsatuvchi provayderlar qarorda belgilangan ma'lumotlarni besh yil davomida saqlashi shart qilib qo'yildi.

Ro'yxatdan o'tish chog'ida xizmat ko'rsatuvchi provayderlar kamida 5 ming barobar bazaviy hisoblash miqdori (1,35 milliard so'm) bo'lgan ustav kapitaliga ega bo'lishi kerak, shundan 3 ming barobar bazaviy hisoblash miqdori O'zbekiston banklaridagi alohida hisobvaraqa saqlanadi.

Jismoniy va yuridik shaxslarning O'zbekiston hududida kripto-aktivlarga ega bo'lgan operatsiyalari soliqqa tortilmaydi, daromadlari esa soliq solinadigan bazaga kiritilmaydi. Valyutani tartibga solish to'g'risidagi qonun hujjatlari kriptovalyutaga oid valyuta operatsiyalariga tatbiq etilmaydi.

Ammo shunga qaramay, raqamli aktivlar sohasida yagona qonunning yo'qligi ushbu sohada yuzaga keladigan munosabatlarni tartibga solishni qiyinlashtiradi va huquqni qo'llash amaliyotini murakkablashtiradi. Shuningdek, ushbu hujjatlarning past yuridik kuchga ega ekanligi xalqaro maydonda yirik aktiv aylanmasiga ega kripto-birjalarning O'zbekiston hududida faoliyat yuritishga qiziqishini pasaytiradi.


Jahongir QURBONOV,
Toshkent davlat yuridik universiteti
o'qituvchisi

4 MUROJAATLAR ADLIYA NIGOHIDA



BUXORO

Buxoro tumanidagi "Yangi turmush" mahallasida yashovchi X. Annayevaning ishdan noqonuniy bo'shatilgani haqidagi yozma murojaati tuman adliya bo'limi tomonidan o'rganildi.



HAM ISHGA TIKLANDI, ISH HAQI UNDIRILDI

Fuqaro X. Annayeva Budjetdan tashqari pensiya jamg'armasi Buxoro tuman bo'limi "Ijtimoiy yagona reyestri"da davlat ijtimoiy yordamlari va xizmatlari ko'rsatish sektori yetakchi inspektori vazifasida ishlab kelgan. Pensiya jamg'armasi Buxoro viloyat boshqarmasining 2023-yil 23-martdagi buyrug'iga muvofiq, u bilan tuzilgan mehnat shartnomasi Mehnat kodeksining 100-moddasi ikkinchi qismi 1-bandiga asosan buyruq chiqqan kundan e'tiboran bekor qilingan.

Mazkur buyruqning qonuniyligi o'rganilganda, ish beruvchi ya'ni Pensiya jamg'armasi Buxoro viloyat boshqarmasi tomonidan X. Annayevaga shtatlar qisqarishi tufayli mehnat shartnomasi 2 oydan so'ng bekor qilinishi haqida 2023-yil 18-yanvarda ogohlantirish berilgan, shu asosda ish beruvchi tomonidan 2023-yil 13-martda boshqarma Kasaba uyushmasi qo'mitasiga tegishli xodimlar bilan mehnat shartnomasini bekor qilishga rozilik berish yuzasidan taqdimnoma kiritilgani ma'lum bo'ldi.

Kasaba uyushmasi qo'mitasining 2023-yil 17-martdagi yig'ilish bayoni bilan taqdimnomaga ilova qilingan ro'yxatdagi xodimlar bilan tuzilgan mehnat shartnomasini bekor qilishga rozilik berilgan. Ammo X. Annayeva kasaba uyushmasi qo'mitasi majlisi o'tkaziladigan sana va joy haqida oldindan xabardor qilinmagani (biror-bir tilxat yoki pochta kvitansiyasi ham mavjud emas) sababli yig'ilishda ishtirok etolmagan.

Holbuki, Kasaba uyushmalari federatsiyasi Kengashi rayosatining 2016-yil 19-apreldagi qarori bilan tasdiqlangan "Kasaba uyushmasi organida ish beruvchining taqdimnomasini ko'rib chiqish tartibi"ning 11-bandida qayd etilganidek, masalasi ko'rilayotgan xodim tegishli kasaba uyushmasi organi majlisida ishtirok etish huquqiga ega. Kasaba uyushmasi organi xodimning majlisda ishtirok etishi uchun yetarli imkoniyat yaratishi lozim.

Demak, Kasaba uyushmasi qo'mitasining yuqorida qayd etilgan majlis bayoni amaldagi qonunchilik talablariga rioya qilinmay rasmiylashtirilgan bo'lib, boshqarmaning 2023-yil 23-martdagi buyrug'i ham g'ayriqonuniy hisoblanadi.

Bundan tashqari, X. Annayevaga mehnat qonunchiligida belgilangan bir oylik o'rtacha oylik ish haqi miqdoridagi ishdan bo'shatish nafaqasi va boshqa to'lovlar bo'yicha to'liq hisob-kitob qilinmagani aniqlandi.

Yuqoridagilardagi ko'ra, tuman adliya bo'limi tomonidan fuqarolik ishlari bo'yicha Buxoro tumanlararo sudiga da'vo arizasi kiritilib, sudning tegishli qarori bilan da'vo kanoatlantirilib, X. Annayeva ishga tiklandi va Pensiya jamg'armasi Buxoro viloyat boshqarmasi hisobidan majburiy progul kunlari uchun 11,5 million so'm mablag' to'lab beriladigan bo'ldi.

Abdurahimxo'ja BAFAYEV,
Buxoro tuman adliya bo'limi boshlig'i



SURXONDARYO

Boysun tumanida faoliyat olib borayotgan X. Suvonov rahbarligidagi "Bekzod me'mor" mas'uliyati cheklangan jamiyati tuman maktabgacha va maktab ta'limi bo'limi bilan 2021-yil 3-sentabr kuni tuzilgan shartnomaga asosan 14-sonli DMTTni joriy ta'mirlab, jamiyat tomonidan 194 million 194 ming 500 so'm miqdoridagi ta'mirlash ishlari bajarilgan. Shuningdek, Sh. Musulmonov rahbarligidagi "Shaxzod me'mori" mas'uliyati cheklangan jamiyati ham tuman maktabgacha va maktab ta'limi bo'limi bilan 2021-yil 6-sentabrda tuzilgan shartnomaga asosan 15-sonli DMTTni joriy ta'mirlab bergan, ya'ni 349 million 629 ming 100 so'm miqdoridagi ish bajarilgan.

Bundan tashqari, mazkur MChJ 2023-yil 26-yanvarda tuzilgan shartnomaga asosan tumandagi 1-sonli umumiy o'rta ta'lim maktabi binosining istish tizimini joriy ta'mirlab bergani uchun 252 million 676 ming 903 so'm miqdoridagi bajarilgan ishlarning qiymati tuman maktabgacha va maktab ta'limi bo'limi tomonidan to'lab berilmagan.

Tadbirkorlarning bu borada amaliy yordam ko'rsatilishini so'rab tuman adliya bo'limiga qilgan yozma murojaatlari o'rganildi va mazkur MChJlar manfaatini ko'zlab, yetkazilgan zararni undirish to'g'risida Sherobod tumanlararo iqtisodiy sudiga da'vo arizalari kiritildi.



QORAQALPOG'ISTON

Xo'jayli tumanidagi 1-sonli umumta'lim maktabining xo'jalik ishlari bo'yicha direktor o'rinbosari lavozimida ishlagan fuqaro D.T. murojaat qilib, u bilan tuzilgan mehnat shartnomasi bekor qilinganidan so'ng unga nafaqa to'lanmagani-dan norozi bo'lib, amaliy yordam berishni so'rab tuman adliya bo'limiga murojaat qilgan.

Ishsiz, nafaqasiz qolgan

DIREKTOR O'RINBOSARI

Murojaat o'rganilganda, fuqaro D.T. haqiqatan ham tuman maktabgacha va maktab ta'limi bo'limiga qarashli 1-sonli umumta'lim maktabida xo'jalik ishlari bo'yicha direktor o'rinbosari lavozimida ishlagani, shuningdek, u bilan tuzilgan mehnat shartnomasi ish beruvchining tashabbusiga ko'ra bekor qilingani, yuridik markazdan huquqiy ekspertizadan o'tkazilib, ijobiy xulosa berilgan buyruqda xodimga ishdan bo'shatish nafaqasi to'lanishi lozimligi ko'rsatilgan bo'lsa-da, to'lanmagani aniqlandi.

Vaholanki, Mehnat kodeksining 173-moddasida (eski tahrirdagi Mehnat kodeksining 109-moddasi) mehnat shartnomasi ish beruvchining tashabbusiga ko'ra bekor qilinganda ishdan bo'shatish nafaqasi to'lanishi belgilangan.

Shunga asosan, adliya bo'limi yuridik xizmat ko'rsatish markazi tomonidan fuqaro D.T.ga u bilan tuzilgan mehnat shartnomasi ish beruvchining tashabbusiga ko'ra bekor qilingani munosabati bilan 1 million 498 ming 238 so'm miqdoridagi ishdan bo'shatish nafaqasi undirib berildi.

Nurya BERDINIYAZOVA,
Xo'jayli tuman adliya bo'limi yuridik xizmat ko'rsatish markazi boshlig'i

TADBIRKORGA PAND BERMANG!



Sudning tegishli hal qiluv qarorlariga ko'ra, tuman adliya bo'limining "Bekzod me'mor" hamda "Shaxzod me'mori" mas'uliyati cheklangan jamiyatlari manfaatida kiritilgan da'vo arizalari to'liq qanoatlantirilib, javobgar Boysun tuman MMTB hisobidan ikkala MChJ foydasiga jami 796 million 500 ming 503 so'm miqdoridagi zararni undirish belgilandi.

N. MAMADIYEV,
Boysun tuman adliya bo'limi boshlig'i



TUG'ILGAN BOLANING
ONASI VOYAGA
YETMAGAN BO'LSA...

– Yolg'iz onadan tug'ilgan bolaning tug'ilishini qayd etish tartibi haqida ma'lumot bersangiz?

Sh. ALIYEVA,
Yangiyo'l tumani

– Bunday holda tug'ilishni qayd etish uchun yolg'iz (qonuniy nikohda bo'lmasdan) ona tomonidan FHDY organiga onaning shaxsini tasdiqlovchi hujjat va yozma ariza taqdim etiladi.

Agar tug'ilgan bolaning onasi voyaga yetmagan bo'lsa, tug'ilishni qayd etish bolaning tug'ilganlik haqidagi tibbiy ma'lumotnoma hamda vasiylik va homiylik organining arizasiga asosan onaning yashash joyidagi fuqarolik holati dalolatnomalarini yozish organi tomonidan qayd etiladi. Bunda bolani tuqqan onaning shaxsini tasdiqlovchi hujjati yoki tug'ilganlik haqidagi guvohnomasi bilan birga yashash va o'qish joyidan rasmi yelimgan ma'lumotnomalar ham taqdim etilishi lozim.

Feruza TURG'UNBOYEVA,
Yangiyo'l tuman FHDY bo'limi mudirasi

Keyingi yillarda aholining kundalik turmushini, yashash sharoitlarini yanada yaxshilashga alohida e'tibor qaratilmoqda. Yangi ko'priklar qurilmoqda, yo'llar ta'mirlanmoqda, aholi toza ichimlik suvi bilan ta'minlanmoqda. Ayniqsa, elektr energiyasiga bo'lgan ehtiyojni to'la qondirish maqsadida rejali ishlar qilinmoqda. Shunday bo'lsa-da, anomal sovuq va anomal issiq davrida aholining elektr energiyasiga bo'lgan ehtiyoji yetarli darajada qondirilmagani ma'lum bo'ldi. Ayniqsa, bu yilgi qishki mavsumda bu holat yaqqol sezilib qoldi. Bu esa odamlarning noroziligiga sabab bo'ldi. Natijada energetik ta'minotni talab darajasiga yetkazish uchun Davlat rahbari topshirig'i bilan aniq chora-tadbirlar belgilandi.

Qishki anomal sovuqda xuddi shunga o'xshash voqea poytaxtimizning Shayxontohur tumani "Oqilon" mahallasida ham sodir bo'ldi. Bugungi kunda mahalla hududida yashovchi barcha mahalliy aholi ko'p qavatli uylarda emas, xonadonlarda, hovli-joylarda istiqomat qilishadi.

Kengashib ish qilishga odatlangan mazkur mahalla ahli yaqinda ko'ngilni xira qiluvchi holatga duch kelishdi. Gap shundaki, he yo'q, be yo'q, hech bir xat-hujjatsiz yaqindagina asfalt qilingan mahalla hududidagi yo'lning chetida quvur tortish uchun qazish ishlari boshlanib ketti. Mahalla ahli ularning kimligini yoki kimning buyurtmasini bajarayotganini ham bilishmadi. Bu esa odamlarning keskin noroziligiga sabab bo'ldi. Ellik chog'li odam norozilik bildirib, mahalla idorasiga kelishdi.

HAMMASI YAXSHILIKKA...

– Mahalla bedarvoza emas, – deydi mahalla raisi Muhabbat Yoqubova biz bilan suhbatda. – Sektor rahbari bilan gaplashdim. Bu ishlar yaxshilikka bo'lyapti, – deyishdi. Quvur tortish ishlari qishki mavsumda elektr energiyasi yetishmovchiligining oldini olish uchun qilinayotganini aytishdi.

Mahalla raisi sifatida ishchilar bilan gaplashdim. Kabel o'tkazish bo'yicha topshiriq bilan kelishganini aytishdi. Shu muammo bilan shahar Elektr tarmoqlari idorasigacha chiqdim, mas'ullar bilan bog'landim, masalaga oydinlik kiritdik. Lekin g'isht qolipdan ko'chgandi. Ko'chamiz yaroqsiz holga kelib bo'lgandi. Prokuratura, tuman elektr tarmoqlari idorasi, hokimlik mas'ullari ishtirokida mahalla faollari bilan muloqot o'tkazildi.

Qishda bizda elektr energiyasida yetishmovchiliklar bo'ldi. Shuning uchun men bu holatni avvaliga to'g'ri qabul qildim. Poytaxtimizning boshqa hududlarida ham xuddi shunday quvurlar tortilgani uchun ishchilarning ishiga qarshilik bildirgan olmadim. Yo'lsolar bilan gaplashganimizda esa ko'cha haqiqatan ham odamlar norozi bo'lganidek, ta'mirtalab holatga kelib qolgani, bu yo'l qaytadan asfalt qilinmasa, vaqti kelib yog'ingarchiliklar sabab ta'mirlangan joylar yana cho'kib,

Suv keltirgan elda aziz, deyishadi. Yo'l qurgan-chi? Har kuni qayergadir yo'lga otlanamiz. O'qishgami, ishgami, biror yumush bilanmi ko'chaga chiqamiz. Borar manzilimiz yaqin, yo'limiz bexattar bo'lishi uchun yurgan yo'llarimiz tekis, ravon bo'lishi, ta'mirtalab bo'lmisligi zarur, albatta. Buning uchun esa, katta mehnat va mablag' talab qilinadi.

AYBSIZ AYBDORLAR



YOXUD YO'L MUAMMOSI

yaroqsiz bo'lib qolishini aytishdi.

"Chumchuq so'ysayam qassob so'ysin" degan gap bor xalqimizda. Shu boisdan, masalaga xolis yondashish maqsadida usta yo'lsolar mutaxassislarining bu boradagi fikrlari bilan ham qiziqdik.

– Ochig'ini aytish kerak, mehnatningiz qadrlanmasa, nohaqlikni sezangiz, siz ham norozi bo'lasiz, albatta. "Oqilon" mahallasi hududidagi tekis, ravon yo'lning yaroqsiz holga kelishi "yo'lning egasi" bo'lgan soha mas'ullarini ham tashvishga soldi.

Prezidentning 2023-yil 11-martdagi "Toshkent shahridagi iste'molchilarni energiya resurslari bilan barqaror ta'minlash chora-tadbirlari to'g'risida"gi qarori bilan 2023-yilda Toshkent shahri Shayxontohur tumanining past kuchlanishli elektr tarmoqlarini yangilash dasturining manzilli ro'yxati ham tasdiqlangan. Mazkur ro'yxatning 8-ustunida "Oqilon" mahallasida TP-2762 va TP-629 oralig'idagi 6 kVli F. Orenburgskiy-2 kabel tarmog'ini rekonstruksiya qilish ko'rsatib o'tilgan.

Shuningdek, qarorning 3-bandida Yunusobod, Shayxontohur, Mirzo Ulug'bek, Yashnobod va Yangiheyot tumanlarida umumiy quvvati 664 MVA bo'lgan 5 ta 110 kV kuchlanishli podstantsiya hamda 49,6 km uzunlikdagi 35 kV va 110 kV kuchlanishli elektr uzatish tarmoqlarini qurish belgilangan.

Mahalla raisi mas'ullar bilan gaplashganida mahalla hududidan quvur o'tkazish uchun qazish ishlari yuqoridagi qaror ijrosini ta'minlash maqsadida amalga oshirilgani aytilgan. Biroq mahalliy aholi oldindan ogohlantirilmagani sababli ham yuzaga kelgan noqulaylikdan norozi bo'lgan.

Kabel tarmog'ini rekonstruksiya qilish ishlari belgilanganidek amalga oshirilgan. Biroq bu borada Toshkent mintaqaviy yo'llardan foydalanish unitar korxonasi bilan kelishilmagan.

YO'LSOZLAR HAM NOROZI

Aholining "Ishonch telefoni"ga qilingan murojaati sababli Toshkent min-

taqaviy yo'llardan foydalanish unitar korxonasi mas'ullari shu vaqtning o'zida mahallaga yetib kelishdi. Ortiqcha o'rganishlarsiz ham bir qarashda ko'rinish turgan holatdan yo'lsolar ham norozi bo'lishdi. Aholining e'tirozlari o'rinni ekani ma'lum bo'lgach, noqulay vaziyatni yuzaga keltirgan aybdor tomon aybini tan olishga majbur bo'ldi. Ish yakunlangach, yo'lni avvalgiday yaroqli qilib ta'mirlashga va'da berildi ham. Lekin yo'lsolarining bu boradagi fikri nafaqat mahalla ahli, balki bizni ham o'ylantirib qo'ydi.

Quvur tortish maqsadida qazilgan joylardagi asfalt yoriqlari har qancha ta'mirlansa ham avvalgi holatiga qaytmisligi, vaqti kelib ozroq muddat o'tgach, cho'kib qolishi tayinligi aytiladi. Har bir ishni ustasi qilsin, deyishadi. Yo'l ta'miri bo'yicha tajribasi yo'q ishchilar "qo'l uchida" ishlab, mendan ketguncha, egasiga yetguncha qabildida qazilgan yerlarni ko'mib, go'yoki avvalgiday holatga keltirar, ammo...

Javobgarlikni to'la his qilish uchun mas'uliyat kerak, albatta. Agar mas'ullar mas'uliyatsiz bo'lsa, bundan yomoni yo'q! Hozircha aholi aybdor tomonning va'dasiga ishonmoqda. Ular-ku, ishini tez orada bitirib ketar, lekin mahalliy aholi shu hududda noqulay holatda yashashga majbur. Ayniqsa, mutaxassis yo'lsolar aytgan vaziyat sodir bo'lsa, odamlar yana yugur-yugur, yoz-yozni boshlashga majbur bo'ladilar.

Ko'pincha ko'cha-ko'yda yurganimizda asfalti yorilgan joylarga duch kelamiz, bunday joylarni chetlab, aylanib o'tishga urinamiz. Avtomashinasining balloni mana shunday yoriqlar o'ydin-chuqur joylarga tushib, mashinasi ta'mirtalab holatga kelib qolgan haydovchilarni ham ko'p ko'rganmiz. Bunday ko'ngilsiz voqealarning asl sababchisi kim ekanini esa o'ylab ham o'tirmaymiz.

– Avtomobil yo'llari va ichki ko'chalarni joriy ta'mirlash ishlari amalga oshirilgandan so'ng xizmat qilish muddati 6-7 yil atrofida bo'ladi, – deydi biz bilan suhbatda Toshkent

mintaqaviy yo'llardan foydalanish unitar korxonasi mas'ul xodimi. – Bunda yo'lning xizmat qilish davri qatnov qismidagi avtomashinalar o'tkazuvchanligiga qarab belgilanadi. Yo'llar va ichki ko'chalarning qatnov qismida yer osti ishlari olib borilganidan keyin asfalt-beton qoplamasining xizmat qilish muddati 4-5 yilga qisqaradi. Sababi, qazilgan joylarda yo'llarni qayta ta'mirlash ishlari belgilangan qoidalarga asosan bajarilmaydi. Qum-shag'al yotqizish qatlam-qatlam amalga oshirilmaydi. Buning natijasida yog'ingarchiliklar sababli vaqt o'tganidan keyin cho'kindilar paydo bo'ladi. Asfalt-beton qoplamasida yoriqlar paydo bo'lishi ko'chani 1-2 yil ichida yaroqsiz holga keltiradi. Bunday holatlarda ko'chaning eni bo'yicha asfalt-beton qoplamasi yotqizilsa, maqsadga muvofiq bo'ladi.

Mutaxassisning tahlil qilishicha, birgina "Oqilon" mahallasidagi quvur o'tgan hududdagi yo'lni qayta ta'mirlash uchun salkam 40 million so'm mablag' sarflanadi. Mahalla hududidagi kabel ko'milgan joyning ta'miri va ishchi kuchi, transport xarajatlari uchun 26 million so'm sarflanishi kerak. Bu hozirgacha kabel o'tkazish uchun qazilib, qayta yopilgan joygacha hisoblangan mablag'! Svetoforning oldi, kabel quvuri ko'milib, hali ta'miri bitmagan ko'chani yangidan ta'mirlash uchun esa shu joyning ta'miri va ishchi kuchi, transport xarajatlari qo'shib hisoblaganda 13 milliondan ortiq pul sarflanadi.

Kabel quvuri ko'milganidan keyin ko'cha yangidan asfalt qilingan taqdirda 34 milliondan ziyod xarajat evaziga ko'cha yaroqli holga kelishi mumkin.

XULOSA

Endi o'zingiz o'ylab ko'ring, bu birgina "Oqilon" mahallasidagi muammo. Agar butun yurtimiz bo'yicha xuddi shunday mas'uliyatsizlarcha ish qilingan bo'lsa, bu holat yo'lsolar uchun qancha muammo tug'diradi? Buning uchun qancha mablag' kerak bo'ladi?! Muammoning og'riqli va odamlarni o'ylantirayotgan tomoni ham ana shundaki!

Bizni o'ylantirgan masala shundaki, agar belgilanayotgan tadbirlar puxta reja bilan qilinsa, bunda aholining yashash sharoitlari, mavjud infratuzilma oldindan hisobga olib ish tutilsa, ayniqsa, xabardor qilish tizimi to'g'ri yo'lga qo'yilsa, bu kabi noroziliklar, noxush holatlar bo'lmisligi aniq! Agar qaror qabul qilishda tomonlar kengashib, kelishib ish qilsa, odamlarning noroziligiga sabab bo'ladigan, ularning tinch-xotirjam hayot kechirishi uchun noqulayliklar tug'diradigan holatlar qayta-qayta sodir bo'lavermaydi.

Hozircha berilgan va'dalarga biz ham ishongimiz keldi. Bu mavzuga yana qaytamiz.

Gulbahor ORTIQXO'JAYEVA,
"Inson va qonun" muxbiri

6 KO'ZGU

Sudga da'vo ariza yoki ariza kelib tushgach, avvalambor, sudya taqdim etilgan hujjatni sinchkovlik bilan o'rganib chiqish, qonun talablari asosida rasmiylashtirilgani, shuningdek mazkur nizo sudda ko'rishga taalluqli yoki taalluqli emasligiga oydinlik kiritishi talab etiladi.

Odil sudlovda TAALLUQLILIK MUAMMOSI



Taalluqlik instituti fuqarolik huquqi munosabatlarning butun bir qismini qamrab oladi. Taalluqlik mavzusining u yoki bu jihatlari fuqarolik protsessual va iqtisodiy protsessual huquqi doirasida Sh. Shorahmetov, X. Yodgorov, M. Mamasiddiqov, Z. Esanova singari olimlar tomonidan o'rganilgan.

Taalluqlikda nafaqat sud, balki barcha davlat hokimiyati va boshqaruv organlari, korxonalar, tashkilotlar, muassasalar, nodavlat notijorat tashkilotlari, uyushmalar, fuqarolarning o'zini o'zi boshqarish organlari tomonidan vakolatiga ko'ra nizolarni hal qilishda ishtirok etadi. Nizolarning sud organlariga tegishli ekanini va sud tizimi bo'g'inlari o'rtasida nizoning turi, sub-

yektlar maqomi (tarkibi), taraf sifatida ishtirok etayotgan jismoniy va yuridik shaxslarning yashash manzili va joylashgan joyi, nizo predmetining turgan (joylashgan) yeri bo'yicha sudga murojaat qilinishi belgilangan. Fuqarolik protsessual kodeksining 26-moddasiga binoan, taraflardan hech bo'lmaganda bittasi fuqaro bo'lgan nizolar fuqarolik ishlari bo'yicha sudlarga taalluqlidir.

Fuqarolik protsessual huquqida taalluqlik mustasno taalluqlik, alternativ taalluqlik, shartnomaviy taalluqlik, shartli (imperativ) taalluqlik turlariga ajratiladi.

Bunda ish sudda ko'rilguncha u yoki bu organlarda ko'rilishi talab

etilmaydi.

Imperativ (shartli) taalluqlik ishning muayyan ketma-ketlik asosida bir nechta yurisdiksiya organlari tomonidan ko'rib chiqilishini, ya'ni qonun hujjatlarida yoki shartnomalarda nazarda tutilgan ayrim hollarda ishlar dastavval sudga qadar boshqa organlarda ko'rilganidan keyingina sudga taalluqli bo'lishini nazarda tutadi.

Alternativ taalluqlik esa muayyan toifadagi ishlar bo'yicha shaxsning o'zining buzilgan huquqlari va qonuniy manfaatlarini himoya qilish bo'yicha bir nechta organga murojaat qilishi mumkinligini nazarda tutadi.

Shartnomaviy taalluqlik alternativ taalluqlikka o'xshab ketadi. Bunda ham taraflar nizoni hal etish vakolatiga ega bo'lgan organni tanlash imkoniyatiga ega bo'ladi. Ya'ni, ular nizoni qaysi organ ko'rib hal qilishini o'zaro kelishgan holda belgilaydi. Aynan shu xususiyat shartnomaviy taalluqlikni alternativ taalluqlikdan farqlash imkonini beradi. Shartnomaviy taalluqlikda bu tanlovga har ikkala tarafning kelishuvi asosida erishilsa, alternativ taalluqlikda bu tanlov taraflardan biriga, asosan, da'vogarga berilganini ko'rish mumkin. Shartnomaviy taalluqlik qoidalariga muvofiq, nizo tegishli organ tomonidan ko'rib chiqilganidan so'ng boshqa organ tomonidan qayta ko'rib chiqilishi


mumkin emas.

Joriy yilning 26-aprel kuni qabul qilingan "O'zbekiston Respublikasining Davlat organlari bilan munosabatlarda fuqarolar va tadbirkorlik subyektlari huquqlarining samarali himoya qilinishini ta'minlash bo'yicha qo'shimcha choralar ko'rilishi munosabati bilan O'zbekiston Respublikasining ayrim qonun hujjatlariga o'zgartirish va qo'shimchalar kiritish to'g'risida"gi qonuni asosida Jinoyat protsessual, Jinoyat-ijroiya, Fuqarolik protsessual, Iqtisodiy protsessual va Ma'muriy sud ishlarini yuritish to'g'risidagi kodekslariga bir qator o'zgartirish va qo'shimchalar kiritildi. Jumladan, Fuqarolik protsessual kodeksi "Ish materiallarini sudga taalluqliligiga ko'ra fuqarolik ishlari bo'yicha suddan boshqa sudga o'tkazish" deb nomlangan yangi 311-modda bilan to'ldirildi. Unga ko'ra, talab fuqarolik ishlari bo'yicha sudga taalluqlik qoidalarini buzilgan holda taqdim etilgan taqdirda, da'vo arizasi (ariza) taalluqliligiga ko'ra iqtisodiy sudga yoki ma'muriy sudga ko'rib chiqish uchun o'tkaziladi. O'zbekiston Respublikasida sudlar o'rtasida sudga taalluqlik to'g'risidagi nizolarga yo'l qo'yilmaydi.

Alisher NAMOZOV,

Sudyalar oliy kengashi huzuridagi Sudyalar oliy maktabi tinglovchisi

SO'RAGAN EDINGIZ



Mahkumlar qanday huquqlarga ega?

- Qonunchilikka ko'ra, mahkumlar qanday huquq va majburiyatlarga ega. Shu haqda ma'lumot bersangiz?

Mahkumlar O'zbekiston Respublikasining Jinoyat-ijroiya kodeksi va boshqa qonunlarda belgilangan istisno hamda cheklashlar inobatga olingan holda, O'zbekiston Respublikasi fuqarolari uchun nazarda tutilgan huquqlar, erkinliklarga ega bo'ladi va majburiyatlarini bajaradilar. Mahkum ajnabiy fuqarolar va fuqaroligi bo'lmagan shaxslar O'zbekiston Respublikasining xalqaro shartnomalarida belgilangan huquqlar, erkinliklarga ega bo'lishlari va majburiyatlarini bajarishlari mumkin.

Mahkumlar huquqlari va majburiyatlarini muayyan jazo turini ijro etish tartibi va shartlaridan kelib chiqqan holda belgilanadi.

Mahkumlar quyidagi huquqlarga ega:

- advokatlardan malakali yuridik yordam olish;
- shaxsiy xavfsizlik;
- vijdon erkinligi kafolatlanadi. Ular har qanday dinga e'tiqod qilishga yoki hech qanday dinga e'tiqod qilmaslikka haqli.

Mahkumlar jazoni o'tash tartibi va shartlariga rioya etishga, jazoni ijro etuvchi muassasa yoki organ ma'muriyatining qonunga asoslangan talablarini bajarishga majbur.

Mahkumlar o'z zimmasiga yuklatilgan majburiyatlarini bajarmasligi qonunda belgilangan javobgarlikka sabab bo'ladi.

Savolga jinoyat ishlari bo'yicha Olmazor tuman sudi sudyasi Mirziyod ABIDOV javob berdi

Bu strategiyani amalga oshirish uchun 2023-2027-yillarda Davlat budjeti mablag'lari, OITS, sil va bezgakka qarshi kurashish bo'yicha Global jamg'arma mablag'lari, Osiyo taraqqiyot banki hamda Osiyo infratuzilmaviy investitsiyalar bankining qarz mablag'lari hisobidan 120 milliard so'm va 54 million dollar mablag' yo'naltirildi. Pul-lar aholi o'rtasida OIV infeksiyasini erta aniqlash, tashxislash va davolash sifatini oshirish maqsadida test-tizimlari va retrovirusga qarshi vositalar-ni xarid qilish, OITSga qarshi kurash markazlari va ularning tumanlararo diagnostika laboratoriyala-rining moddiy-texnika bazasini rivojlantirish, mu-taxassislarining bilim va ko'nikmalarini oshirish, keng targ'ibot ishlarini o'tkazish, shuningdek, boshqa tashkiliy tadbirlar uchun sarflanadi.

O'zbekistonda 2027-yilga borib OIV yuqtirib olgan shaxslarning 95 foizi o'z maqomini bilishi, maxsus davolash kurslari bilan qamrab olinishi, 95 foizining qonida virus yuklamasi aniqlanmaydigan darajaga tushishi rejalashtirilmoqda. Shu vaqtga kelib, OIVning onadan bolaga yuqishiga barham berish ham ko'zda tutilgan. Unga ko'ra, aholi orasida OIV infeksiyasi tarqalishiga qarshi kurashish samara-dorligini oshirishga doir 2023-2027-yillarga mo'ljalla-ngan kompleks chora-tadbirlar dasturi tasdiqlan-di. Statistikaga nazar soladigan bo'lsa, kasallikning onadan bolaga yuqish darajasi 2021-yilda 0,7 foizni tashkil etgan bo'lsa, 2013-yilda bu ko'rsatkich 2,3 foiz bo'lgan. 2011-yildan 2021-yilgacha 18 yoshgacha bo'lgan bolalar o'rtasida kasallanish 3 baravardan ko'proqqa kamaygan.

Sog'liqni saqlash vazirligi Adliya vazirligi bilan birgalikda 2023-yil 1-iyundan Toshkent shahri va Sirdaryo viloyatida, 2023-yil yakuniga qadar esa boshqa hududlarda "Elektron hukumat" tizimining idoralararo integratsiya platformasi orqali FHDYo organlari va tegishli tibbiyot muassasalari o'rtasida elektron hamkorlik tashkil qilindi. 2023-yildan

Birlashgan Millatlar Tashkiloti Bosh assambleyasi tomonidan 2030-yilga borib OIV epi-demiya-siga barham berish uchun "95-95-95" strategiyasi ilgari surilgan. Unda OIV yuqtirib olgan shaxslarning 95 foizi o'z maqomini bil-lishi, maxsus davolash kurslari bilan qamrab olinishi, 95 foizining qonida virus yuklamasi aniqlanmaydigan darajaga tushishi kerakligi rejalashtirilgan.

BEFARQ BO'LMANG!



OIV infeksiyasi aniqlangan holatlar monitoringini ta'minlash, real vaqt rejimida preparatlar va diagnostikumlarning harakatlanishini kuzatib borish imkonini beruvchi elektron axborot tizimi yaratildi. Tizimni Ichki ishlar vazirligi, Adliya vazirligi, Iqtisodiyot va moliya vazirligi huzuridagi Pensiya jamg'ar-masining elektron bazalari bilan integratsiya qilish orqali o'zaro axborot almashinuvi yo'lga qo'yildi.

Sarvar G'AFFAROV,

Sirdaryo viloyati OITSga qarshi kurashish markazi vrach-laboranti

2023-yil 30-aprel kuni o'tkazilgan referendumda umumxalq ovoz berishi orqali qabul qilingan O'zbekiston Konstitutsiyasi inson, uning hayoti, erkinligi, sha'ni va qadr-qimmatini oliy qadriyat hisoblanadigan insonparvar demokratik davlatni, ochiq va adolatli jamiyatni barpo etishga qaratilgan ko'plab yangi normalar bilan to'ldirildi.

"XABEAS KORPUS" INSTITUTI VA "MIRANDA QOIDASI" BU HAQDA NIMALARNI BILAMIZ?

Asosiy qonunimizda bevosita inson huquq va erkinliklarini ta'minlashga qaratilgan ko'plab yangi normalar o'z aksini topdi. Masalan, shaxsni sudning qarorisiz 48 soatdan ortiq muddat ushlab turish mumkin emasligi belgilab qo'yildi. Shaxsning erkinligini cheklash bilan bog'liq har qanday harakat faqatgina sud qarori asosida amalga oshirilishini belgilovchi mazkur qoida tergov organlarining insonlarni noqonuniy hibsga, asossiz qamoqqa olishi va saqlashiga yo'l qo'ymasligiga qaratilgandir. Bu orqali xalqaro e'tirof etilgan "Xabeas korpus" institutining qo'llanish ko'lami yanada kengaytirildi.

"Xabeas korpus" – ya'ni, jinoyi ta'qibga uchragan fuqaroning adolatli sud muhokamasiga bo'lgan huquqining qadimiy e'tiroflaridan biri hisoblanadi. Angliyada paydo bo'lgan ushbu institut aybdor shaxs ushlanganidan to' sudga qadar unga nisbatan ko'rilayotgan huquqiy chora jarayonini o'rganadigan muassasa hisoblanadi. O'sha davrdan buyon xalqaro huquq qoidalarida fuqaroni sud jarayoniga qadar ushlab turilishi holatlari "Xabeas korpus" instituti, deb yuritiladi.

Mamlakatimizda "Xabeas korpus" instituti 2008-yildan tatbiq etilgan bo'lib, uning qo'llash doirasi yillar davomida kengayib bormoqda, tergov jarayoni ustidan sud nazorati qat'iy ravishda kuchaytirilmoqda. Yangi tahrirdagi Konstitutsiyaning 27-moddasida ushbu holatlarga guvoh bo'lishimiz mumkin. Ushbu atama boshqa ayrim yondosh moddalarda ham o'zining ifodasini topgan.

"Miranda qoidasi"ga muvofiq, ushlab chog'ida shaxs o'z huquqlari to'g'risida xabardor qilinishi lozimligi, uni ushlab turgan huquqni muhofaza qiluvchi organ xodimi shaxs huquqlari tushunarli bo'lganmi, degan savolga ijobiy javob olishi lozimligi nazarda tutiladi.

Ushbu qoida mazmunini Konstitutsiyamizning 27-moddasiga kiritilgan – "shaxsni ushlab chog'ida unga tushunarli tilda uning huquqlari va ushlab turilishi asoslari tushuntirilishi shart", degan jumalarda ko'rish mumkin.

Umuman, Konstitutsiyamizga kiritilgan "Xabeas korpus" va "Miranda qoidasi" tamoyillari inson huquq va erkinliklarini ta'minlash kafolati, umume'tirof etilgan institutlar konstitutsiyaviy darajada kuchaytirilayotganidan dalolat beradi.

Shuningdek, konstitutsiyada hech kim o'ziga va yaqin qarindoshlariga qarshi guvohlik berishga majbur emasligi belgilanib, bu qoidalarining Konstitutsiyada belgilanishi jinoyi ta'qib ostidagi har qanday shaxsga yoki uning yaqin qarindoshlariga ruhiy bosim va turli tahdidlar o'tkazish, uning sha'ni va qadr-qimmatini kamsitish kabi boshqa noqonuniy usullar qo'llanishining oldini olishga xizmat qiladi.

Yana bir muhim norma – agar shaxsning o'z aybini tan olgani unga qarshi yagona dalil bo'lsa, u aybdor deb topilishi yoki jazoga tortilishi mumkin emasligi kafolatlanadi. Bu hol jinoyat bo'yicha haqiqatni aniqlash, shuningdek, aybsiz insonlarning javobgarlikka tortilishining oldini olishga, ayni paytda, jinoyat sodir etgan haqiqiy aybdor shaxs yoki shaxslarning jazodan qutulib ketishining oldini olishga xizmat qiladi.

Bahodir QORAYEV,

jinoyat ishlari bo'yicha Boyovut tuman sudi raisi

Buxoro viloyat adliya boshqarmasi, Buxoro davlat universiteti hamda Toshkent davlat yuridik universiteti hamkorligida "Yangi O'zbekistonning Yangi Konstitutsiyasi – inson huquq va erkinliklarini ta'minlashning mustahkam poydevori" mavzusidagi respublika ilmiy-amaliy konferensiyasi tashkil qilindi.

Konferensiyada O'zbekiston Respublikasi Konstitutsiyaviy sudi hamda Buxoro viloyat sudi vakillari, O'zbekiston Respublikasi Oliy Majlisi Senati a'zolari, fan doktorlari va professor-o'qituvchilar o'z ma'ruzalari bilan ishtirok etishdi.

Konferensiyani Buxoro viloyat adliya boshqarmasi boshlig'i A. Rahmatov hamda Buxoro davlat universiteti rektori O. Hamidov kirish so'zi bilan ochib, yangi tahrirdagi Konstitutsiyaning mazmun-mohiyati va ahamiyati, uni o'rganishning zarurati masalalariga to'xtalib o'tishdi.

Konferensiyada ta'kidlanganidek, mamlakatimizda 2023-yil 30-aprel kuni o'tkazilgan referendum orqali yangi tahrirdagi O'zbekiston Respublikasi Konstitutsiyasi qabul qilindi. Ushbu referendumda ishtirok etgan fuqarolarning 90,21 foizi yangi tahrirdagi Konstitutsiyani qabul qilishni ma'qullab ovoz berdi.

Yangi tahrirdagi Konstitutsiya Yangi O'zbekiston strategiyasini amalga oshirishning siyosiy-huquqiy asoslarini yaratib, milliy davlatchilik taraqqiyotining tarixiy muhim bosqichida davlat va jamiyatni yanada rivojlantirishning ustuvor yo'nalishlarini belgilab berdi.

Konstitutsiyaning 1-moddasida O'zbekiston suveren, demokratik, huquqiy, ijtimoiy va dunyoviy davlat ekanligi belgilab qo'yildi. Konstitutsiyaning boshqa barcha moddalari uning birinchi moddasida belgilangan ushbu tushunchalarni tasdiqlashga qaratilgan, desak mubolag'a bo'lmaydi.

Yangi tahrirdagi Konstitutsiya birinchi navbatda insonparvarligi, inson huquqlarining kafolatlarini birinchi o'ringa qo'yganligi bilan ajralib turadi. Unga kiritilgan normalarning yarmidan ko'pi insonning huquq va erkinliklarini himoya qilishning kafolatlarini kuchaytirish va mexanizmlarini mustahkamlashga qaratilgan.

Konferensiyada Konstitutsiyaviy sud raisining o'rinbosari, yuridik fanlar doktori A. G'afurov "Yangi O'zbekistonning Yangi Konstitutsiyasi – milliy konstitutsionalizm tarixidagi noyob hodisa", Toshkent davlat yuridik universiteti bo'lim boshlig'i, yuridik fanlar bo'yicha falsafa doktori (PhD) B. Narimonov "Huquqiy davlat prinsipi asosida inson qadrini ulug'lashni sifat jihatdan yangi bosqichga chiqarishda yangi tahrirdagi Konstitutsiyaning ahamiyati", Oliy Majlis Senati a'zosi A. Huseynova "Yangi tahrirdagi Konstitutsiya bo'yicha inson huquq va erkinliklarini ta'minlashda fuqarolik jamiyati institutlarining roli", Buxoro davlat universiteti yurisprudensiya va ijtimoiy-siyosiy fanlar kafedrasida dotsenti G. Yangiyevning "Yangi konstitutsiyaning jamiyat hayotidagi zarurati va dolzarb masalalari tahlili", Buxoro viloyat sudi sudyasi Sh. Quvvatov "Sud-huquq masalalari va odil sudlovni ta'minlashning muhim konstitutsiyaviy-huquqiy asoslari" mavzularida ma'ruza qilishdi.

Buxoro viloyat adliya boshqarmasi boshlig'ining birinchi o'rinbosari, yuridik fanlar bo'yicha falsafa doktori (PhD) Sh. Bahronov "Yangi Konstitutsiyadagi demokratik huquq va erkinliklar bilan bog'liq normalarni hayotga tatbiq etish masalalari" mavzusida ma'haruza qildi. Ma'ruzachi O'zbekiston Respublikasi

88 KONFERENSIYA

Konstitutsiya hayotning barcha jabhalarida biz uchun birinchi navbatdagi, zarur va oliy yuridik kuchga ega bo'lgan huquqiy-hujjat sifatida xizmat qiladi. Shu sababli, Konstitutsiyaning mazmun-mohiyati va ahamiyatini tushunish va amalda ijro etilishini ta'minlash barchamiz uchun juda muhim.

Yangi Konstitutsiyada "inson-jamiyat-davlat" g'oyasi



Prezidentining 2023-yil 8-maydagi "Yangi tahrirdagi O'zbekiston Respublikasi Konstitutsiyasini amalga oshirish bo'yicha birinchi navbatdagi chora-tadbirlar to'g'risida"gi PF-67-son farmoni bilan yangi Konstitutsiyaning ijrosini qanday ta'minlash masalasida chora-tadbirlar belgilab berilganligi masalalariga alohida to'xtalib o'tadi.

Ma'ruzachi ta'kidlaganidek, farmonda davlat organlari va tashkilotlarining rahbarlari yangi tahrirdagi Konstitutsiyani amalga oshirish bo'yicha chora-tadbirlar ijrosini o'z vaqtida ta'minlash uchun shaxsan javobgar hisoblanadi. Konstitutsiya oliy yuridik kuchga ega ekanligidan kelib chiqib, davlat organlari va tashkilotlari, sud va huquqni muhofaza qiluvchi organlar faoliyatida to'g'ridan-to'g'ri va so'zsiz qo'llanilishi shart. Konstitutsiya normalari ularni amalga oshirish uchun boshqa qonunchilik hujjatlarining mavjud emasligi yoki qonunchilikka Konstitutsiyaga muvofiq o'zgartirish va qo'shimchalar kiritilmaganligi vaji bilan qo'llashni rad etish qat'ian taqiqlanadi.

Yangi tahrirdagi Konstitutsiyada davlat qurilishining yangi strategik maqsadi – ijtimoiy davlat qurish ekanligi belgilab berildi, ijtimoiy adolat va birdamlik prinsiplari joriy etildi, inson huquq va erkinliklarini himoya qilishning mutlaqo yangi mexanizmlarini nazarda tutuvchi konstitutsiyaviy asoslar mustahkamlandi. Konstitutsiya davlat va jamiyat boshqaruvi tizimidagi yondashuvni va faoliyat tamoyillarini tubdan o'zgartirishga, Yangi O'zbekistonda o'zaro munosabatlarning asosi sifatida "davlat-jamiyat-inson" tamoyili o'rniga g'oyasini asos qilib qo'yishga qaratilgan.

Konferensiyada so'zga chiqqanlar yangi Konstitutsiya Yangi O'zbekiston strategiyasini amalga oshirishning siyosiy-huquqiy asoslarini yaratib, milliy davlatchilik taraqqiyotining tarixiy muhim bosqichida davlat va jamiyatni yanada rivojlantirishning ustuvor yo'nalishlarini belgilab berganligini aytib o'tishdi.

O'z muxbirimiz

8 REKLAMA



QISHLOQQURILISHBANK

ATB "Qishloq qurilish bank" jamoasi
barcha yurtldoshlarimizni

Qurbon hayiti

bilan samimiy
muborakbod etadi!

Quant mobil
ilovamizni
yuklab oling!

Download on
App Store

Download on
Google Play



Xizmatlar litsenziyadangan.

www.qishloqqurilishbank.uz +998 78 150 00 55, 1254

© Davomi. Boshlanishi 1-betda



SO'Z QADRI – O'Z QADRIMIZ!

To'g'ri, bugun bayram! Odatda, bunday kunda hamma o'z tajribasi va yutuqlari haqida yaltiroq va silliq gaplar ko'proq aytilishiga o'rganib qolgan bo'lsa-da, bu gal aksincha, jurnalistlar gohida fojialarni yoritishdan seskanmay, afsuslanmay qo'yganimizni tan olishga majburmiz. Jamiyatga ham ana shu qora xabarlar tobora singib bormoqda. Diydami qatirgan bunday lavhalar vahshiylikka oddiy hol deb qarash ko'nikmasini paydo qilayotgani esa undan ham ayanchli.

Ulug' adib Abdulla Qahhorning "Adabiyot atomdan kuchli, lekin uning kuchini o'tin yorishga sarflamaslik kerak" degan oltin qoidasiga qasdma-qasd so'zni ko'proq begunoh odamlarning fojiasi sharhiga, baxtsizliklari tahliliga, bo'lmag'ur voqealar reklamasiga ishlatishga o'rganib qoldik, shu bilan shuhrat orttirish mumkin, degan taskin bilan o'zimizni ovutayapmiz. Mavzularimiz buncha taxir, buncha achchiq, tuyg'ularimiz buncha sovuqlashib bormoqda? So'zning qadri o'z qadrimiz ekanligini unutdikmi?

Jurnalistika bizga qismat ekan, jurnalistlar davrning ko'zgusi va kuychisi ekan, bu ko'zguning yuziga qon sachrashidan, bu kuyning pardasi bevaqt uzilishidan asrash istagi biz uchun har narsadan ustun bo'lishi kerak emasmi? Mayli, jurnalist kamchiliklarga murosasiz, illatlarga ayovsiz bo'lsin, albatta, adolat tarafdori, haqiqat talabgori bo'lsin, ammo aslo yovuzlikning targ'ibotchisiga, vahshiylarning xabarchisiga aylanmasin! Zero, Hadisda ham noxush xabarlarini tarqatmangiz, deb bejiz aytilmagan!

Marusa HOSILOVA,

"Inson va qonun" muxbiri

E'OLONLAR

Toshkent viloyat adliya boshqarmasining 2023-yil 16-iyundagi 159-um-sonli buyrug'i bilan "BURGUT-2022" advokatlik byurosi advokati Rustamov Abduraxab Abdalimovichga Toshkent viloyat adliya boshqarmasi tomonidan 2021-yil 4-iyun kuni berilgan advokatlik faoliyati bilan shug'ullanish huquqini beruvchi TS 000480 raqamli litsenziya va advokatlik maqomi Nurafshon tumanlararo ma'muriy sudining 2023-yil 2-maydagi hal qiluv qaroriga asosan 1 (bir) oyga to'xtatildi.

Qashqadaryo viloyat adliya boshqarmasi tomonidan joriy yilning 20-iyun kuni Rayxonov Mirazam Ismoilovichga viloyat adliya boshqarmasi tomonidan 2022-yil 27-oktabrda berilgan KS 000301-reyestr raqamli advokatlik faoliyati bilan shug'ullanish huquqini beruvchi litsenziyaning amal qilishi tugatildi.

Andijon viloyat adliya boshqarmasining 2013-yil 14-iyundagi 130-um-sonli buyrug'i bilan adliya boshqarmasi tomonidan 2018-yil 19-dekabrda berilgan AN №000081-sonli litsenziya egasi "LEGAL-WORK"

advokatlik byurosi advokati Ibragimov Yaxyojon Yaqubovichning advokatlik maqomi va advokatlik guvohnomasining amal qilishi 2023-yil 3-iyun kundan kasallik davriga (1-yildan oshmagun) muddatiga, 2022-yil 19-dekabrda berilgan AN №000405-sonli litsenziya egasi, "A.S.Huquq" advokatlar hay'ati advokati Qodirov Xayrullo Maxamadsoliyevichning advokatlik maqomi va advokatlik guvohnomasining amal qilishi 2023-yil 3-iyun kundan kasallik davriga (1 yildan oshmagun) muddatiga to'xtatildi.

Xorazm viloyat adliya boshqarmasi tomonidan jinoyat ishlari bo'yicha Xonqa tuman sudining 2023-yil 26-apreldagi 1-2209-2301/12-sonli jinoyat ishi yuzasidan chiqarilgan hukmiga asosan "Yuridik yordam JShM" advokatlik byurosi advokati Matyoqubov Jasurbek Shonazarovich Jkning 205-moddasi 2-qismi "a" bandi bilan ayblil deb topilganligi sababli boshqarmaning tegishli buyrug'i bilan unga berilgan advokatlik faoliyati bilan shug'ullanish huquqini beruvchi litsenziyaning amal qilishi va advokat maqomi tugatildi.

INSON
va qonun

MUASSIS:
O'ZBEKISTON RESPUBLIKASI
ADLIYA VAZIRLIGI

"Adolat" milliy huquqiy axborot
markazi nashri
info@adolatmarkazi.uz

2007-yil 3-yanvarda
O'zbekiston
Matbuot va axborot
agentligida
0081-raqam bilan
ro'yxatga olingan



Bosh
muharir
Asliddin
ALIMARDON

TAHRIR HAY'ATI

Alisher Karimov
Furqat Tojiyev
Xayotjon Klichev
Sevara O'rinboyeva
Yorbeq Iskandarov
Dilfuza Ergasheva

Tahririyatga kelgan
qo'lyozmalar taqiz
qilinmaydi va muallifga
qaytarilmaydi.

Navbatchi
Yorbeq Iskandarov
Sahifalovchi-dizayner
Jasur Tojiyboyev

Nashr indeksi: 137

"Inson va qonun" gazetasi hamda "Huquq va burch" ijtimoiy-huquqiy jumali birlashtirilgan tahririyati kompyuter bazasida terildi va sahifalandi. A3 bichimida, 2 bosma taboq hajmda, ofset usulida "KOLORPAK" MCHJ bosmaxonasida chop etildi.

Korxona manzili: Toshkent shahri, Yunusobod tumani, 17-mavze, Yangi shahar ko'chasi, 1a-uy

Tiraji – 3850
Buyurtma – 1885

Topshirish vaqti – 19:00
Topshirildi – 20:00

MANZILIMIZ:

100115, Toshkent sh.
Amir Temur shohko'chasi
19-uy.

Faks: (71) 233-28-18
Obuna bo'limi:
(71) 233-25-65

Bahosi kelishilgan narxda

1 2 3 4 5